

titur, & coram mirantibus hominibus incrementum tantum suscipit, ut etiam quercum mediocrem æquet, id est, triginta circiter palmorum altitudinem, & femoris crassitiem, floribusque in summitate decoretur. Quodque magis mirandum, intra paucos dies, utpote quatuor, vel quinque, hanc molem attingit, adeo ut incrementum ejus etiam oculis percipi possit. Tale quid visum nuper apud Monspelienses, & alias urbes ejusdem Provinciæ, utque in Catalaunia; viderunt populi integri, viderunt amici mei, vidi ipse, anno 1647. & adhuc videri potest in horto D. Perier, Pharmacopœi Monspeliensis: quod miraculum non parvum ei lucrum attulit. Planta hæc tandem marcescit nimio illo conatu, nec tamdiu latuerat, nisi ut collectis viribus illud ageret spiritus ejus architectonicus. Iisdem uti possem rationibus in hac observatione, quibus usus sum in observatione, de puero subito ad ingentem molem aucto, tamen licet de hac retractatum integrum conficere decreverim, quædam breviter attingam, si prius dixero, antea idem contigisse in urbe Piscenensi, in eadem provincia, & in conspectu Regis nostri, & Cardinalis Richelii, multorumque magnatum, ubi intra 36. horas ad 28. palmos excrevit, & ejus figuram delineandam curavit à pictore eximio Rex illustrissimus LUDOVICUS XIII.

hanc